



**E-MAILED**  
AUG 06 2009

## **COMUNICADO DI PRENSA**

**Fecha: 05 di augustus 2009**

**No.: 07-2009**

**Oranjestad** - Comision Bon Boluntad (CBB) a tuma nota di e confrontacionan cu a tuma lugar durante fin di siman cu a pasa entre simpatisante di diferente partido politico. Anticipando posible problema entre manifestante di diferente partido, prome cu fin di siman ya CBB a publica un carta na e partidonan politico pa pidinan atene nan mes na ley y no haci manifestacion sin cu tin e permiso necesario di autoridad encarga cu esaki.

Ta di lamenta cu e asunto a bay for di man den algun caso, unda tabata trata di varios incidente cu e siguiente elementonan:

- parada cu no tabata conta cu permiso oficial; e parada aki a bay topa cu uno oficial resultando den un situacion tenso, unda presencia di polis mester a evita peor;
- di varios banda tabatin acto di provocacion;
- bringamento cu persona herida, unda simpatia partidario tabata hunga un papel;
- abuso di alcohol ta un elemento negativo importante den evento publico;
- actuacion irresponsable den trafico durante parada;
- presencia di baby y mucha chikito den parada, unda nan ta core peligro innecesario.

CBB ta haci un yamada riba tur partido pa no solamente abstene di tene parada sin permiso, sino tambe comunica cu simpatisante di partido pa no crea parada espontaneo, sin permiso, cu por resulta den problema di orden publico, especialmente ora topa cu otro parada, cu tin o no tin permiso.

Ta di spera cu pa e fin di siman venidero y e resto di e campaña lo por evita e tipo di incidente aki, cu no ta contribui nada na un ambiente positivo y trunkil propicio pa tene eleccion. Esaki ta di suma importancia, ya cu si e incidentenan aki no para, nan por sigui escala te yega na un momento cu otro tipo di violencia, incluso violencia cu arma, por bay tuma lugar. Y esaki ta caminda cu ningun ciudadano consciente lo kier mira e situacion yega.

Tambe CBB ta desea di enfatiza cu nos mester puntra nos mes como ciudadano, kico realmente ta e valor di tur e muestranan di presencia riba caminda publico durante lunas, mientras cu di otro banda menos atencion ta bay na desaroya y publica loke e partidonan kier trese dilanti como nan programa pa e periodo di gobernacion venidero.

Den politica ta trata di trese dilanti con un partido tin pensa di bay dirigi gobernacion di un pais, kico ta su ideanan riba tereno economico, social, financiero, riba tereno di medio ambiente, ecologia, educacion, salubridad publico, deporte, combati delincuencia, resolve problema di ciudadano di tur y cada edad, no simplemente solicita apoyo di e ciudadano sin cu e tin un minimo idea kico ta bay haci unavez e partido ta den gobierno, cu su apoyo.

Secretariado di Comision di Bon Boluntad :

Tel. 582-1120 Ext. 34/41-Fax. 588-3200

E-mail [secretariat@arubachamber.com](mailto:secretariat@arubachamber.com)

Website: [www.arubachamber.com/ComisionBonBoluntad.htm](http://www.arubachamber.com/ComisionBonBoluntad.htm)



CBB desde inicio di su trabao na 1994 ta boga pa un campaña limpi pero tambe di nivel, y cu esaki kier meen un campaña den cual ta trata otro cu respet y dignidad y ta haci un esfuerzo pa hiba un dialogo y comunicacion cu e votador en general, dunando debido y completo informacion kico ta e plan di gobernacion. Ta di spera cu nos por mira un campaña cu ta bay mas den e direccion aki.

Atentamente,  
Na nomber di Comision Bon Boluntad



Lydia Emerencia  
Presidente

Secretariado di Comision di Bon Boluntad :  
Tel. 582-1120 Ext. 34/41-Fax. 588-3200  
E-mail [secretariat@arubachamber.com](mailto:secretariat@arubachamber.com)

Website: [www.arubachamber.com/ComisionBonBoluntad.htm](http://www.arubachamber.com/ComisionBonBoluntad.htm)